



ル 5
3150
18



黔南識略卷二十七

貴州巡撫長白愛必達撰

興義府

興義府禹貢梁州南境古夜郎地漢爲牂牁郡地蜀漢爲興古郡地唐盤州地隸戎州都督府宋爲于矢部元爲普安路隸雲南行省明洪武二十三年設安籠守禦千戶所於安籠箐口宏治十一年廣西安隆土官岑軾助兵有功割安籠所阿能等十八寨以賞其功隸廣西萬曆四十三年仍隸貴州

國朝康熙二十六年改安籠所爲南籠廳移安順府通

判駐其地雍正五年總督鄂爾泰以紅水一江天限黔粵奏請江以南屬廣西江以北宜屬貴州陞南籠廳爲南籠府以廣西西隆州所屬紅水江以北之地設永豐州並撥安順府屬之普安州安南縣普安縣俱隸焉嘉慶二年額老寨狃苗滋事經畧勒保剿平之改南籠府爲興義府永豐州爲貞豐州裁黃草壩州判置興義縣撥府屬之花閣五屯並普安三營二里之地歸興義縣管轄又撥普安州之上下羊場阿捧阿西冊亨州同之巴皓亭隸府管轄嘉慶五年又撥貞豐州之迴龍灣廠歸府管理十六年改普安州

爲直隸廳與府同歸西道管轄領貞豐一州興義普安安南三縣設知府一教授一訓導一經歷一統轄地方東至貴陽府定番州分駐羅斛州判之桑郎界四百里南至廣西西隆州之紅水江七十里西至普安廳屬之障古二百一十里北至安順府郎岱廳之毛口河二百五十里東南至貞豐州之者香紅水江三百九十里西南至雲南羅平州之江底二百四十里西北至雲南宣威州之拖長江四百二十里東北至安順府永甯州之盤江二百八十里廣六百一十里袤三百二十里親轄地方東四十里至府轄之打

牙寨與冊亨州同之坡賴接界南三十里至府轄之石門坎梅子口與冊亨州同之三道溝接界西一百六十里至冊亨州同新撥歸府之巴皓亭紅水江接界北七十里至普安廳新撥歸府之上下羊場與普安廳屬之三昧塘接界東南四十里與冊亨州同之冗保接界西南七十里與冊亨州同之壩榜接界西北二十里與普安廳之普昧接界東北六十里與貞豐州之上者黨接界左連府轄之籠納山外與安南縣接界東西廣二百里南北袤一百里由府至京師八千二百餘里郡境東以桑郎山爲藩籬西以

障古山爲鎖鑰毛口盤山踞於北石門坡底扼於南水則南北盤江劃爲天塹昔以疆域畸零未擅西南之勝今則幅員恢廓實爲險要之區城舊爲安籠所城明永樂二年建規制狹隘府署倉獄俱在城外乾隆七年始建石城圍舊城於內周七里三分計一千二百三丈有奇高一丈五尺門五龍井山在城東隅三峯峭峙上有洞廣數丈深莫測名曰天坑中峯下有泉水名珍珠泉味清冽城中汲飲餘溢外溪溉田卽東龍井又有西龍井在城西西山之麓桅杆山在城南隅將軍山在城東一里興隆山在城西二十里

黔陽諸山卷二十一
三
舊名坡疊山四面峭削步徑裁通上建有興隆寺馬
嘴山在城南五里銅鼓山在城南三里又有雙鳳山
金星山在城西半里上建梓潼閣九峯山在城西七
里周十餘里高二里上建九峯中有水田牛角山在
城西二十里天榜山在南城外高數百仞上有古刹
萬壽山在城北上建萬壽宮玉屏山在城北一里籠
納山在城北七十里自普安縣境抵貞豐州西北橫
亘數十里籠納溪出焉灌田數千畝入貞豐州界觀
音洞在城西一里水由洞出極清冷石門坎在城南
三十里康熙二十年逆賊吳世璠分兵據黃草壩征

南大將軍賴塔統滿漢官兵由泗城州奪石門坎拔
安籠所繞賊後大破之是也北盤江界滇黔於西南
源自威甯州西界山入滇霑益宣威二州界仍流至
黔東逕普安廳普安縣安南郎岱永甯而南由三江
口東合於紅水江是水在威甯曰可渡河在郎岱曰
毛口河在貞豐曰羅炎河以其水清亦曰清水江診
其川流更無殊派矣南盤江導源霑益州之花山洞
逕南甯縣東爲東小河又逕陸涼州東爲中延澤又
逕宜良縣東北爲大赤江又南逕路南州西爲巴盤
江又東南逕師宗彌勒二縣環曲靖雲南澂江三府

廣西一州之境至羅平州入貴州界逕郡城南謂之紅水江亦曰巴皓河經冊亨亦曰八渡江劃黔粵之界會北盤江入粵達於海洪亮吉水道考以爲卽水經注之溫水也都威河在城西三十八里廣四丈源出普安廳匯於鍋背海伏流數十里入紅水江潭深魚美居人捕以爲利卡子河一名魯溝在城北五十里廣五丈許發源於普安廳之魯曲遠阿棒寨又名阿棒河達於貞豐州綠海在城東北十里眾水匯焉澄而不流水色深碧四時不改中有招公堤康熙中遊擊招國遴築後圯乾隆二十八年里人復修焉東

隔崇山又有■處海綠海之水由石洞潛洩於此周圍可二里中有小山爲■處寨相傳先有大魚寨民捕食是夜雷雨大作卽沈爲海水淺時山頂墻垣遺迹猶存北海子在城東北上抵北關下連綠海延袤十餘里有石長丈餘如魚形昂首向城門居人呼爲躍魚灘春冬水涸海坪寬濶可牧馬牛以冲海在城西南四里深不可測旁有竇水注而入如尾閘蝦蟆井在城北十五里上有石如蝦蟆因名十八先生墓在城西門外明永明王由榔自廣西走貴州孫可望迎之入安籠所改爲安龍府無人臣禮從臣計遣使

黠齋論冊卷二十一
密召李定國於粵共圖可望謀洩可望殺大學士吳
貞毓以下十八人皆不屈被害時人收遺骸葬焉表
曰十八先生墓碑載從臣吳貞毓張鐫周永吉楊忠
徐極蔣乾昌李元開李頌朱議屢鄭允元趙廣禹蔡
續易士佳胡士瑞朱東旦任斗墟內侍張福祥全爲
國等十八人順治十一年事也按明史吳貞毓傳有
給事中林青陽御史林鍾無李頌楊忠二人致貞毓
傳稱青陽間道馳至定國所馬吉翔報可望可望遣
其將鄭國械貞毓等嚴刑拷掠諸人各賦詩大罵而
死其家人合瘞於安龍北關之馬場已而青陽逮至

亦被殺已建廟於馬場勒碑大書十八先生成仁處
以旌其忠是林青陽死在諸人後不得與十八人之
數也嘉慶二年苗變殉難士民夏承榮劉才智等二
百三十二人婦女夏張氏趙高氏等五十人道光八
年彙題請建昭忠節義二祠致祭焉郡處貴州極南
熱多寒少每春夏之交陰雨暴霽嵐氣薰蒸中人如
瘧有頭疼胸懣脾瀉諸症蓋瘴癘最多云成熟田畝
三萬八千五百二十七畝三分有奇徵米三千三十
三石有奇又自嘉慶三年戡定苗變後逆絕入官田
土共一千六畝零額收科粗穀一千二十二石有奇

黔陽通志卷二十一
六
歲照秋收中米時值變價除支放土弁工食外約餘穀七百石零道光七年遵照新定章程所餘租穀卽存貯府倉於青黃不接之時減價平糶秋收買補還倉預計積貯以備不虞額收秋糧耗米四百八十二石有奇又新額徵正耗地丁銀七十三兩有奇鹽稅銀一百六十六兩有奇遇閏增銀十三兩有奇水銀歲解課稅銀一千五百兩有奇魚稅銀十二兩棉花鹽觔當課牙帖銀八兩五錢額貯常平等案穀三萬四千零八十二石有奇社倉穀二千八百八十八石有奇因嘉慶二年苗變焚燬無存學額歲科試各十

二名舊有九峯書院新改梳峯書院爲生童肄業之所有田租以供膏火不敷者由府捐給道光五年設養正義學置有租穀以供師資城中駐劄安義鎮總兵官一員遊擊三員分防一員守備三員分防一員千總六員分防三員把總十二員分防五員制兵一千八百名原設兵二千二百二十名康熙間裁兵七百二十名雍正間添兵三百名因狎苗在額老寨起釁故於彼地設額老汛把總一員兵八十名又新設卡子河汛把總一員兵八十名狗場汛舊制原駐外委一員兵十八名因苗變後改駐把總一員添兵三

黔南雜記卷二十一
十二名共兵五十名馬鞭田汎原駐把總一員兵二十
十二名改駐千總一員添兵五十八名共兵八十名
今於道光十二年奉文每百名兵內裁汰二名府轄
仲苗居十之八九猓夷居十之一二仲家爲苗中最
黠者在昔佩刀挾弩伏莽升陵是其長技今則向化
畏法其習全除而鼠竊狗偷之事時亦爲之男苗薙
髮已久頭纏青花布巾衣則漢裝通漢語婦女服飾
仍沿舊俗每歲三月三日宰猪牛祭山分肉各寨男
婦飲酒食黃糯米飯苗語以是日爲拈山猶漢語呼
爲祭山神也三四兩日各寨不通往來誤者罰之六

月六日栽插已畢又宰祭分食如三月呼爲更將漢
語過小年也男婦不信醫用巫禳之其巫名曰報暮
死則火化今知用棺矣婚喪一踵陋習苟簡從事男
婦惟嗜酒每逢場集三五成羣必醉而後歸猓羅有
黑白之分黑猓稱大姓爲貴白猓稱小姓爲賤一切
婚嫁貴賤不相紊也昔時稱其盤馬射獵挾鏢試準
今則向化日久已無好武之習惟聽土目之子孫約
束以種土畜牧爲生鮮有盜竊猓男薙髮以白花布
巾纏頭衣同仲苗婦女長袍短裙銀環貫耳髻首稍
異仲婦其信鬼尙巫又與仲苗同按此猓夷在昔爲

土目之佃戶卽土兵也分地而耕納租於主者是爲公田其餘眾苗通力合作土目按畝收利者則屬私田自改土以來其公田已屬糧冊而私田存於土目爲口食之資苗民耕種糧田輸納而外出穀一半斗於土目至今土佃之名猶存也東南鄉之懷德西北鄉之永化二里情形如此至安仁一里爲屯田漢民主之苗民耕之其完租輸納又與二里稍異地產通草紅花高山陡巖宜種包穀平地處宜種紅薯近則種橡養蠶更有成效矣府無驛遞渡口餘與各郡同論曰事有理之所必無內地之人雖三尺童子皆知

其非者而苗人則深信不疑釀爲巨獄殞其身首而不覺悟故諸苗訐訟一經漢奸播弄雖至死不吐實情必先拘其指使之入而後可以發其覆否則謂背盟不祥必干鬼怒也蓋其信巫畏鬼之心甚於畏法漢奸每先與之宰雞蒞誓謂之喫血喫血之後乃爲之授意作詞以漁其利往者興義苗匪滋事賊中有號爲七絡鬚者少游蕩湖南北間無所得食歸則揚言得異人術可避兵刃但以紙扇揮之雖火器無能中傷遠近諸苗神其說眞以爲可揮扇而抗拒也遂蠶起時城中鎮標兵皆調赴湖南軍營賊偵知無備

所在釋騷迄總督帶兵至不旋踵而罪人斯得附和者靡有孑遺矣夫揮扇拒兵之說婦人孺子之所不信也而苗人信焉且從而蜩螗沸羹焉非愚之又愚者乎竊謂治苗疆者在治其害苗之人邪教左道類皆江湖求食流耳始猶僅爲餬口計後則煽惑愈眾能聚而不能散必至於負隅反噬而後止則無事之時稽查不宜不密也矧興義自軍需以後土曠人稀多滇蜀流寓之民良莠雜糅習俗不一嘉慶十三年間曾又有會匪巨案經地方大吏先事訪聞痛加懲創以後稍稍安輯蓋待其既發而後制之與伺其未

發而先禁之勞逸殊而難易亦逕庭也此輩之來跡秘而風聲自張非涸跡於星卜卽嫁名於醫巫不張皇其術業斷無以聳動愚頑官以是時從而掩捕之易如反手但審其實在有據者卽律以惑眾重典蓋殺此一人卽可以安千萬人並不止爲此一方愚苗計也夫火烈民望而畏之故鮮死焉國僑善用猛者也而聖人稱爲惠人治興義者其有取於斯夫

興義縣

興義縣在省城西南六百三十里去府城百八十里唐爲附唐縣地舊唐書作附庸屬盤州宋爲于矢部元爲普

安路地明爲普安州地

國朝雍正五年設州判分駐黃草壩卽今縣治也嘉慶二年平定仲苗裁州判置興義縣撥府屬之花閣五屯並將普安州屬之三營二里地方撥縣管理十四年陞普安州爲直隸州縣屬焉十六年以縣距州遠距府近改普安州爲直隸廳仍屬府撤普安州訓導歸縣巡檢仍分駐捧鮮因地係烟瘴凡知縣巡檢典史俱定爲三年俸滿調回省城候陞其境東至興義府城一百八十里西至雲南平彝縣黃泥河八十里南至捧鮮營一百里又六十里爲三江與西隆州

交界北至普安縣樓下河九十里東南至巴結塘廣西西隆州界百六十里西南至雲南羅平州屬江底河六十里東北至普安廳屬魯土營一百四十里西北至普安廳屬狗場營木狼河九十里據郡治之上游爲三省咽喉重地城週三里計五百六十丈甃以石門五乾隆十一年建城南有筆架山又西里許有龍頭山東北有獅子山又東有白馬山繞城之河爲城西河發源於東壩之龍潭下達天生橋至巴皓河巴皓河者府南有巴皓亭河以名焉卽紅水江也西南有黃泥河亦名江底河上自平彝縣羅平州入

縣界逕白雲屯西南入紅水江城東有馬別河上流
爲普安縣樓下河右合普安廳屬木浪河亦達於紅
水江凡由滇入黔則以黃泥河爲要害由粵入黔則
以江底河爲要害而正南距城一百六十里之三江
則劃然黔粵之界限其距城二百里之天生橋雖羊
場烏道盤紆陡峻此不過通郡之捷徑未足云險要
也邑之山水形勝視他省爲奇險而較之黔省諸境
則差覺逶迤寬舒焉其田土則近城之東壩長壩泥
溪壩三處平疇無際緣稼如雲黔省苦無水利此則
上引龍潭下達巴皓河蓄洩以時旱澇無憂黔省水

田之多無過於此者至若包穀雜糧則山頭地角無
處無之其附近粵西之三江一帶地氣炎熱漢苗多
種棉花而蔗漿亦收美利歲徵正耗銀一千二百二
十兩零中有彝科吹絲無耗等名目因地之肥瘠定
賦之上下民稱便焉額徵秋糧正耗米九百二十四
石一斗零改徵正米五百六十八石七斗零除撥歸
捧鮮巡檢收米九百九十石外縣倉實收米五百八
十八石零存支兵糈廩米又收官租穀四百十九石
零除支土弁工食外存穀二百七十一石零存貯變
解額貯常平穀一萬一千三十八石零義倉穀三千

石此外每年普安廳輓運兵米一千零五十三石普
安縣輓運兵米二百十二石除轉運捧鮓巡檢收放
兵米四百八十二石四斗外縣倉實收輓運米七百
八十二石六斗學額文武生各八名建有筆山書院
以筆架山得名城中駐遊擊一員分防捧鮓守備一
員捧鮓城雍正七年建添設馬別汎把總一員頂效
汎把總一員革上汎把總一員鸚歌嘴撤駐白雲屯
千總一員江底汎外委一員黃坪營舊有土弁一名
嘉慶二年裁革土司添設土守備千把外委均未給
有印信號紙漢苗戶口統計二百八十六寨三十屯

一萬五百七十五戶內僅五十四寨係苗戶其餘二
百三十二寨及三十屯則均屬客民緣自嘉慶二年
苗變後土著之苗民日耗流寓之客民日增現在統
計男婦大小四萬五百六十二名口客民十居七八
苗民不過十之二三五方糶雜良莠不齊較苗民爲
難治境內米價最賤市斗較官斗逾倍運石米入市
須四人分任之所得價不過一金無業之人一家十
口日得百錢便可鼓腹地產棉花婦女勤工作紡車
之聲絡繹於午夜月明時地本苗疆素無縉紳近多
有撥科第登仕版者

黔南識略卷二十八

黔南識略卷二十八

普安縣

貴州巡撫長白愛必達撰

普安縣在府治西北二百四十里省城西南五百三十五里唐為盤水縣地元為普安路地明為普安州之地置新城新興二守禦千戶所

國朝順治十八年普安州屬馬乃營土目叛總督趙廷臣討平之撥普安州馬乃樓下鼠場安逸五土里安南縣屬之興仁興順忠順三漢里並附於新城新興二所設普安縣隸安順府康熙二十二年徙縣治於



新興所雍正五年改隸南籠府卽今興義府設知縣一縣丞一駐新城教諭一訓導一典史一其境東至府屬三昧塘界一百六十里西至平遠州屬雞場均界一百二十八里南至普安廳屬三板橋塘界五里北至安南縣屬大橋河界三十五里東南至興義縣屬車榔寨界一百有五里西南至普安廳屬松曼蠟寨界三十五里東北至安南縣屬九盤山界一百二十里西北至平遠州屬巖山寨一百二十里廣二百八十八里袤四十里城週一里三分計二百五十二丈有奇高二丈門四今存東南北三門原爲新興所

城康熙二十六年改築邑居萬山之中絕少平曠之地西南四十里有九龍山高出層霄昔建城其上今呼爲舊城坡西北三十里有松歸山虬松翠竹上有招提樓閣參差爲新路名勝其地屢入普安廳界內東北二十里爲江西坡入滇舊路舊安南衛治此明參政朱家民建城其上曰有嘉今圯康熙二十年大帥克盤江逆賊吳世璠遣僞將軍線緘屯兵江西坡扼險以待大將軍章泰大敗之卽此地也稍西爲碧雲山樹木葱鬱西二十五里爲鸚鵡山俗名鸚哥嘴有鸚鵡寺虎石在城東南石形如虎魯溝河在城東

黑南諸略卷二十八
八十里卽府屬之阿棒河逕郡西北之木舌寨山東
流合於南盤江馬別河在城南八十里磨盤山下山
峭水深飛瀑下垂爲通滇官道設有塘汎水道提綱
作馬軍河者誤也阿希河自縣東南山西南流注於
馬別河下流入南盤江大橋河卽安南之江西坡河
黃泥河在讓里下通毛口渡上通雲南有小舟對渡
爲水城界鹽販必由之路堅固關在城西北老鷹巖
南爲白沙驛係入滇新路芭蕉關在城北十里鑿嶺
爲關奇險阨要今設塘爲入滇舊路江西坡大橋係
安南普安分界處阿姑屯橋春夏水發頗洶湧又岔

河木卡橋深溪河橋俱在縣之東南田畝成熟者一
萬五千二十二畝有奇額征正米二千二十七石有
奇正銀四百三十兩八錢有奇並一五加耗秋米分
貯縣城新城二倉支給各處兵糧廩餼並輓運興義
縣冊亨小同兵糧正銀坐支驛站經費餘銀並變價
解庫額貯常平倉穀二萬二千八百九十九石有奇
又溢額穀七百九十石有奇俱貯新城義倉穀六百
石學額文武各八名義學一原設安南營分防把總
一員兵丁四十四名嘉慶三年於新城汎添設安義
鎮右營分防守備一員千總一員外委一員青山汎

把總一員巴林龍場二汛把總各一員共兵丁三百
十名外有松歸舍基二塘歸普安營轄本城汛
轄塘五新城汛轄塘十現在漢民一萬六千一百七
十八戶男婦大小共六萬四千一百三十五名口苗
民有狃家猓獠二種嘉慶二年平定後始陸續復業
客戶則江西湖南四川三省民爲多又興讓里有老
巴子亦苗類由湖南移居於此其服飾與漢民同語
音稍異場市十二以十二支分配遇期趁集稅口一
設龍場額徵鹽稅正羨銀四百一十六兩驛站原設
鑽子窰驛丞經管乾隆二十年改移白沙係借普安

廳地上至普安廳上寨驛四十里下至安南縣阿都
驛四十五里額馬五十四站夫一百名舖二入省大
道二一由芭蕉關至安南縣爲舊路一由松歸塘至
白沙驛爲新路山地多種包穀蕎菽之屬產棉花通
草紅花及松杉棕竹有楮樹其皮可爲紙餘與各縣
同

安南縣

安南縣在府治北一百九十里省城西南四百有八
里元爲普安路地明洪武十五年置尾灑衛尋廢十
七年置尾灑驛二十年置尾灑遞運所二十一年置

尾灑站及尾灑堡二十三年置安南衛治江西坡二十五年遷治尾灑堡屬貴州都司

國朝康熙二十五年改衛爲縣隸安順府雍正五年改隸南籠府卽今興義府設知縣一教諭一訓導一典史一其境東至普安州界三十里西至普安縣界三十里南至普安縣界七十七里北至普安州界四十二里東南至貞豐州界一百五十里西南至普安縣界八十里東北至永甯州界三十里西北至普安州界五十里廣七十里袤一百九十里萬山連亘一徑斜穿如老雅關海馬關鵝翅勝三望坡阿郎巖等處皆

邑中極險之區而盤江尤滇黔之鎖鑰防禦之要區也城週七百九十三丈磬以石門四明洪武二十五年建隨九山之高下狀如蓮瓣故名蓮城天馬山在城內獨秀山在城東一里飛鳳山在城東二里尾灑山在城南二里山勢高聳其巔常有雲霧土人因名尾灑猶華言水下也玉枕山在城南一里晴龍山在城西五里龍翔山在城東北五里一名巍山俗呼歪山山頂有洞泉水四時不涸禱雨有奇驗盤江山在城東三十里跨永甯普安諸界高出諸山鳥道千盤民艱汲飲乾隆初總督高其倬捐金於數十里外鑿

山引水以濟之斷山在城南八十里白駒山在城西
南二十餘里一名白山自鴉關橫亘至西坡河峻崢
層聳旁有峭壁傳上有白駒見則歲大豐爆石巖在
城東二十里山半有泉流注深潭白石巖在城西南
五里飛泉千仞暑月生寒朝陽洞在城東一里日出
則光先照有泉澄澈如練海馬洞在城東十二里大
路旁洞中可容百人傳昔有海馬見於此碧玉洞在
城東南三十五里懸崖削壁上有三小洞中有寒泉
冬春不竭土人曾避寇於此清源洞在城西三里官
道旁洞有清泉行旅資焉江西坡在城西南三十里

坡旁有河明洪武中置衛於此欲飛石在城內學宮
旁方廣數丈明總兵鄧子龍鑄欲飛二字於上盤江
在城東四十里其源出威甯州折而南逕雲南霑益
州仍入貴州界曰可渡河又折東流至大山而伏又
東南二十餘里出山東南流曰天生橋又東南逕縣
境始曰盤江又東南逕永甯州西境卽今之鐵索橋
與永甯州夾江爲界者也其間崖壁扼束林箐深阻
江流紆回隱見廣不過里許至沙麓津則上下皆迫
狹鬱蒸瘴癘行旅艱阻嘉靖初常疏滌之大章河在
城東四十里有舟渡阿黑河在城東南十餘里蹊徑

幽僻深不可測樹葉落其上鳥輒啣之白麓泉在城南一里源出晴龍山澗中清澗池在城內縣署前東門池在城東廣數畝飲馬池在城南三里鴉關下傳漢將軍關索至此人馬渴甚泉忽湧出成池明叅政林喬勒石曰甘泉勝迹康熙初總督蔡毓榮泐且以飲人四字雙清井在城西北隅二井相連水極清甘海馬關在城東十二里兩山之凹廣僅尋丈舊有關跨於其上關下僅容一騎老鴉關在城南里許入滇舊路兩厓之間最爲扼要烏鳴關在城西二里明洪武中置有戍兵西坡河橋在城西南係滇黔要津東

西兩岸俱高厓爲安南普安兩縣分界處天氣四時如秋一歲之中陰雨過半境內跬步皆山地多田少現在成熟田二萬九百五十七畝有奇其田有科屯之分屯爲明時軍田糧重價輕科爲民田糧輕價重額徵正米三千五百九十八石有奇正銀二百二兩有奇內除供支本境營汛兵糈廩餼仍撥納貞豐州兵米五百三十六石又輓運興義府四百七十三石貞豐州八百八十八石排杉汛三百六十石餘米變價申解實貯穀九千四百二十七石有奇米一萬一千一百一十石有奇學額文武各八名義學一苗寨

亦多社館城中駐都司一員千總一員把總二員共
兵二百十名排杉汛千總一員兵一百名廖箕
箒汛外委一員兵五十名普安汛把總一員兵四十
四名外有盤江汛隸永安營兵米就縣支發設上下
九舖又改設新路九舖盤江十一城多在縣境明史
右叅政朱家民討平盤江外阿野魯頗諸砦於是相
度盤江西坡板橋海子馬場諸要害築石城五宿兵
衛民又於其間築六城解舍廬井畢備今諸處遺壘
尙存列當驛卽今列唐驛本尾灑驛雍正七年改設
額馬五十匹站夫五十名民壯二十名場市十四以

十二支分配週期趁集民人漢少夷多通屬四里惟
泗夷一處分二十起多獵人狝家花苗三種各有頭
目以管轄之無土司其俗與他處同

貞豐州

貞豐州在府治東北一百二十里省城西南二百七
十五里古百粵地漢屬交阯郡宋爲泗城州地元析
置安隆砦明永樂元年設安隆長官司轄泗城州隸
廣西布政司

國朝順治十八年陞泗城州爲府康熙五年改置西隆
州雍正五年總督鄂爾泰以泗城府延袤二千餘里

北與黔省普安南籠永甯定番相錯山高地險夷獯
雜處奸匪藉爲淵藪請改土歸流以紅水江爲界割
江以北地泗城之長壩尋郎羅斛等十六里並西隆
州之羅煩冊亨等四甲半零二十一寨撥歸貴州建
永豐州於長壩乾隆十四年撥羅斛歸定番州嘉慶
二年平定狝苗改永豐州爲貞豐州撥冊亨州同屬
之巴皓亭隸府五年撥州屬之迴龍灣廠歸府管轄
設知州一員州同一員駐冊亨學正一員吏目一員
其境東至廣西南丹土州界四百五十里南至廣西
泗城府界二百二十里西至普安直隸廳界三百二

十里北至永甯州界一百里東南界廣西三百二十
里東北界永甯州一百八十里西南界羅斛三百二
十里西北界安南縣四十里廣三百三十里袤三百
五十里州地萬山叢疊爲烟瘴苗疆初無城池惟東
北珉球地方山勢就坦烟瘴稍輕以爲治所乾隆七
年始建石城週三里三分甃以石門四州署後枕峻
山前俯平原羣峯拱立屹爲形勢城北七里有頂岡
層巒互嶂遠望如欄與州城相倚迤而西一小山峙
城之右望同螺髻特萬石笋高二丈餘色青黝如古
鐵叩之有聲謂之珉球柱正對署後山爲州之屏那

山在城北十五里危峯桀豎其下多居民九盤山在城北九十里連山相接數十里最爲險峻花江巖在城北九十里兩山夾水陡入不測行旅經此無不危心又有石屯距州一百四十里徑懸磴仄上者如梯下者如墮過者猿挂而行者黨嶺在城西南二十里羊場縈繞界以急流深谷州之關隘也北盤江在城西北導源於威甯州西亂山中南流入雲南霑益州界又東南入安南縣境逕永甯州之募役長官司沿州界九盤山下爲清水江其江萃上游山溪諸水挾深湍激逕九盤花江板貴董箐百層者坪羅炎打賓

者香渡邑諸處下會紅水江入於粵南盤江卽紅水江源出雲南霑益州花山洞東南流逕郡南自西南入州境其水四時皆赤故名紅江沿冊亨流至雙江口入廣西泗城府界謂之左江注於海此南北盤江之原委也城西小溪發源於安南之水橋流入州城山後入地伏流十一里出爲小溪入北盤江龍井在城南二里清冷澄澈相對半里許有泉自石匣流出名石匣泉州城資以汲飲城內有安樂井以之炊粟則變而赤土人食之無患漢人食之則病惟龍泉石匣爲佳署後山頂有泉清冽倍常病熱者取飲可解

孔明城在城北三十里者相寨有土埂高數尺周二百餘丈傳爲武侯劄營處地素苦瘴三四月間尤甚黃芽際天炎熱蒸鬱氣瀰漫於山澤間遭之立病諺言避瘴之法有四謂勿起早勿食飽勿脫襖勿洗澡也州屬上江之田以種計上田每斗種約十五觔下田八九觔豐年上田可收草穀十石稍次六七石一夫力耕可至四斗下江則山多田少種宜棉花小米州屬八甲共六十八亭零七村每亭額徵銀五十兩零四錢一分共額徵銀三千四百七十四兩七錢三分不加耗每亭額徵米一十一石九斗五升共額徵

米八百三十七石三斗不加耗安南縣撥納秋米五百三十六石安南縣挽運米八百八十八石撥納冊亭米一百五十六石八斗二升額徵秋糧米石按月支放長壩營兵米一千一百二十六石八斗支放定頭汛兵米五百九十七石六斗支放王母汛兵米一百八十七石二斗支放高坎汛兵米一百八十八石額貯常平倉穀一萬九千四百四十石零二斗各鄉設有社倉因嘉慶二年苗變燒毀無存學額自雍正八年始行設學文生四名嘉慶十五年於永從縣原減武學四名撥設武生二名城駐遊擊守備千總各

一員把總六員外委三員額外二員遊擊初駐長壩
雍正七年移駐珉球守備分駐冊亨嘉慶二年平苗
後又撥守備一員把總二員外委一員駐改設之定
頭汛而以永安營都司一員駐於冊亨王母汛有把
總一員高坎汛有把總一員一營三汛始此共駐兵
五百名水旱共二十五塘州地無驛遞由者
相塘至花江渡口爲赴省要津商賈不絕官設渡船
西北由龍場汛自巴林新城安姑塘至安南盤江汛
出關嶺亦爲赴省大道由者結汛歷永甯屬募役司
出關嶺爲赴省僻徑又城南七十里有下江龍渡設

有官船以渡行人百層者坪羅炎鄉民自置小船通
行下江並粵西場市二十一離城遠近不等以十二
支分配遇期趁集樹多青桐楓香杉梓產棉花甘蔗
廠有迴龍灣水銀廠係雍正間開採嘉慶間撥歸興
義府管理土司地向隸粵西泗城土府分立兵目管
理雍正五年裁革土司各兵目皆稱業戶上江四甲
業戶黃姓下江四甲業戶王姓黃王二姓爲州大族
嘉慶二年苗變各業戶率苗堵禦有功設土守備二
員土千總一員土把總八員土外委十六員未准承
襲現在戶口兩江八甲共六十八亭零七村計民戶

共八千九百戶男婦大小共三萬二千六百一十名
口苗係獯家狝家二種風俗與各處同

冊亨州同

冊亨州同在省城西南七百三十五里去府治百一
十里州治西百四十里舊爲安隆土司地屬廣西西
隆州

國朝雍正五年改土歸流撥隸黔省其境東至本州界
一百二十里西至興義府界一百二十里南至廣西
西隆州界一百六十里北至興義府界八十里廣二
百八十里袤二百二十里城周二里九分計四百八

十五丈有奇築土爲墉下甃以石設門三乾隆十一
年建境內苗蠻錯處徑路險絕城西南三里有玉屏
山橫亘數里壁立如削朝暉夕霽白光照耀故名其
奇險最著者有者壘山望如層城人莫窮其境坡鄧
山四時瘴霧人不可涉又有小寶山南望山皆與者
壘相埒紅江俗名八渡江卽南盤江也爲黔粵要津
樂盤河在城東北南流爲達嶺河又南爲百樂河南
入於紅江冗渡河入龍渣河至者壘迤里入紅江田
畝多在山凹水溝之旁土黑而肥高處則多磽薄向
來未經丈量額徵秋米四百八石條銀一千九百一

兩有奇不加耗兵米不敷本州撥米一百五十六石
有奇普安縣撥米六百三十四石有奇常平倉貯穀
八千四百石有奇州同分理錢糧案件仍聽知州統
轄嘉慶二年設冊亨營城中駐劄都司一員千總一
員把總一員外委二員額外二員存城兵一百
名分防八渡汎把總一員兵五十七名三道溝汎
把總一員兵五十四名暨年汎把總一員兵六十名
場市八城一鄉七各有定期坡枸板塔二廠產砂題
定每十觔抽課二觔樂繁水銀廠因燒煎無出久經
封閉庄寨分四甲半共二十四亭計四百六十三寨

設三汎十六塘渡口一由八渡出西隆爲大道由羅
炎河至州城爲僻徑地產棉花樹多桃李梨杏無桐
茶杉桑之利苗惟狃家一種其俗與各處同

黔南識略卷二十八終

